



AN COIMISIÚN
EORPACH

An Bhruiséil, 14.2.2020
COM(2020) 53 final

ANNEX

IARSCRÍBHINN

a ghabhann leis an

Togra le haghaidh Cinneadh ón gComhairle

maidir leis an seasamh a ghlacfar thar ceann an Aontais Eorpaigh sa Chomhchoiste um Chomhar Custaim a bhunaítear leis an gComhaontú idir an tAontas Eorpach agus an Nua-Shéalainn maidir le comhar agus cúnamh riaracháin frithpháirteach i gcúrsaí custaim a mhéid a bhaineann le glacadh rialacha nós imeachta inmheánacha an Chomhchoiste um Chomhar Custaim

DRÉACHT

CINNEADH Uimh. [.../2019] Ó CHOMHCHOISTE AN AONTAIS EORPAIGH - NA NUA-SHÉALAINNE UM CHOMHAR CUSTAIM

an ...

lena nglactar a Rialacha Nós Imeachta

AN COMHCHOISTE UM CHOMHAR CUSTAIM,

Ag féachaint don Chomhaontú idir an tAontas Eorpach agus an Nua-Shéalainn maidir le Comhar agus Cúnamh Riaracháin Frithpháirteach i gcúrsaí custaim, a tugadh chun críche an 3 Iúil 2017, agus go háirithe Airteagal 20.2(d) de,

De bharr go bhforáiltear in Airteagal 20.2(e) den Chomhaontú go nglacfaidh an Comhchoiste um Chomhar Custaim a rialacha nós imeachta inmheánacha,

TAR ÉIS CINNEADH A DHÉANAMH MAR A LEANAS:

Airteagal 1

Glactar leis seo Rialacha Nós Imeachta Chomhchoiste an Aontais Eorpaigh - na Nua-Shéalainne um Chomhar Custaim, mar a leagtar amach san Iarscríbhinn a ghabhann leis an gCinneadh seo.

Airteagal 2

Beidh feidhm ag an gCinneadh ón dáta a nglacfar é.

Airteagal 3

Déanfar téacs an Chinnidh seo a tharraingt suas i ndúblach i mBéarla, agus beidh comhúdarás ag gach ceann de na téacsanna sin. Féadfaidh gach páirtí foráil a dhéanamh maidir le haistriúcháin a chur ar fáil ina dteangacha oifigiúla eile.

Arna dhéanamh in/sa ..., an

Do Chomhchoiste an Aontais Eorpaigh - Nua-Shéalainn um Chomhar Custaim

Na Comhchathaoirligh

IARSCRÍBHINN

RIALACHA NÓS IMEACHTA CHOMHCHOISTE AN AONTAIS EORPAIGH-NA NUA SHÉALAINNE UM CHOMHAR CUSTAIM

Airteagal 1

Cathaoirleacht

Beidh ionadaí ón Aontas Eorpach agus ionadaí ón Nua-Shéalainn ina gcomhchathaoirligh ar Chomhchoiste an Aontais Eorpaigh - na Nua-Shéalainne um Chomhar Custaim (dá ngairtear “an Comhchoiste” anseo feasta) arna bhunú i gcomhréir le hAirteagal 20.1 den Chomhaontú idir an tAontas Eorpach agus an Nua-Shéalainn maidir le Comhar agus Cúnamh Riaracháin Frithpháirteach i gcúrsaí custaim, a tugadh chun críche an 3 Iúil 2017 (dá ngairtear “an Comhaontú” anseo feasta), agus déanfaidh an Comhchoiste a ndualgais a chomhlíonadh faoi Airteagal 20 den Chomhaontú.

Airteagal 2

Ionadaíocht

1. Cuirfidh gach Páirtí Conarthach sa Chomhaontú liosta a chomhaltaí sa Chomhchoiste in iúl don Pháirtí Conarthach eile sa Chomhaontú. Déanfaidh Rúnaíocht an Chomhchoiste an liosta a riar agus a choinneáil cothrom le dáta.
2. Féadfaidh ainmní ionadaíocht a dhéanamh ar chomhchathaoirleach ón gComhchoiste ag cruinniú i gcás nach féidir leis/léi freastal air. Cuirfidh an comhchathaoirleach, nó a ainmní nó a hainmní, an t-ainmniú in iúl i scríbhinn don chomhchathaoirleach eile agus do Rúnaíocht an Chomhchoiste chomh luath agus is féidir.
3. Déanfaidh ainmní an chomhchathaoirligh ón gComhchoiste cearta an chomhchathaoirligh a fheidhmiú a mhéid a leagtar amach san ainmniú. Chun críocha na Rialacha Nós Imeachta seo, maidir le tagairtí do chomhaltaí agus do chomhchathaoirligh an Chomhchoiste a bheidh ann ina dhiaidh seo, tuigfear go bhfuil an t-ainmní san áireamh leo.

Airteagal 3

Rúnaíocht an Chomhchoiste

Gníomhóidh oifigeach ón Aontas Eorpach agus oifigeach ón Nua-Shéalainn go comhpháirteach mar Rúnaíocht an Chomhchoiste.

Airteagal 4

Cruinnithe

1. Tiocfaidh an Comhchoiste le chéile arna iarraidh sin ag ceachtar den dá Pháirtí Chonarthacha. Tionólfar na cruinnithe sa Bhruiséil agus in Wellington ar bhonn idirmhalartach, mura gcomhaontaíonn na comhchathaoirligh a mhalairt.
2. Féadfar cruinnithe de chuid an Chomhchoiste a réachtáil trí fhíschomhdháil nó trí theileachomhdháil.
3. Réachtálfad Rúnaíocht an Chomhchoiste gach cruinniú den Chomhchoiste ar dháta agus in áit a chinneadh na comhchathaoirligh.

Airteagal 5

Tarmligean

Féadfaidh oifigigh rialtais ó na Páirtithe Conarthacha faoi seach comhaltaí an Chomhchoiste a thionlacan. Roimh gach cruinniú, cuirfidh gach comhchathaoirleach ón gComhchoiste comhdhéanamh beartaithe na dtoscaireachtaí ó gach Páirtí Conarthach in iúl don chomhchathaoirleach eile.

Airteagal 6

Doiciméid

Nuair a bheidh pléití an Chomhchoiste bunaithe ar dhoiciméid tacaíochta i scríbhinn, déanfaidh Rúnaíocht an Chomhchoiste na doiciméid sin a uimhriú agus a scaipeadh mar dhoiciméid de chuid an Chomhchoiste.

Airteagal 7

Comhfhreagras

1. Comhfhreagras a sheolfar chuig comhchathaoirligh an Chomhchoiste, cuirfear ar aghaidh chuig Rúnaíocht an Chomhchoiste é le cur i gcúrsaíocht, i gcás inarb iomchuí, i measc chomhaltaí an Chomhchoiste.

-

2. Comhfhreagras ó chomhchathaoirligh an Chomhchoiste, seolfaidh Rúnaíocht an Chomhchoiste chuig na faighteoirí é agus déanfaidh an Rúnaíocht an comhfhreagras a uimhriú agus a scaipeadh, i gcás inarb iomchuí, i measc chomhaltaí an Chomhchoiste.

Airteagal 8

An clár oibre do na Cruinnithe

1. Dréachtóidh Rúnaíocht an Chomhchoiste clár oibre sealadach le haghaidh gach cruinnithe. Cuirfear ar aghaidh é, i dteannta na ndoiciméad ábhartha, chuig comhaltaí an Chomhchoiste, lena n-áirítear na comhchathaoirligh, tráth nach déanaí ná 15 lá féilire roimh thús an chruinnithe.

2. Áireofar ar an gclár oibre sealadach na hítimí sin a bhfuair Rúnaíocht an Chomhchoiste iarratas ó Pháirtí Conarthach ina leith chun iad a chur san áireamh ar an gclár oibre, i dteannta na ndoiciméad ábhartha, tráth nach déanaí ná 21 lá roimh thús an chruinnithe.

3. Déanfaidh comhchathaoirligh an Chomhchoiste leagan den chlár oibre sealadach don Chomhchoiste atá formheasta go comhpháirteach a phoibliú.

4. Glacfaidh an Comhchoiste an clár oibre ag tús gach cruinnithe. Féadfar na hítimí eile seachas iad siúd atá ar an gclár oibre sealadach a chur leis an gclár oibre, má chomhaontaíonn na comhchathaoirligh amhlaidh.

5. Féadfaidh comhchathaoirligh an Chomhchoiste a chinneadh de chomhthoil, cuireadh a thabhairt do bhreathnóirí, lena n-áirítear ionadaithe ó chomhlachtaí eile de chuid na bPáirtithe

Conarthacha nó saineolaithe neamhspleácha, a bheith i láthair ag a chruinnithe chun faisnéis ar ábhair sonracha a chur ar fáil.

6. Féadfaidh comhchathaoirligh an Chomhchoiste a chinneadh, de chomhthoil, na tréimhsí ama a shonraítear i míreanna 1 agus 2 a laghdú nó a mhéadú chun na riachtanais a bhaineann le cás ar leith a chur san áireamh.

Airteagal 9

Miontuairiscí

1. Dréachtóidh Rúnaíocht an Chomhchoiste dréacht-mhiontuairiscí ar gach cruinniú, laistigh de 21 lá ó dheireadh an chruinnithe, mura gcinnfidh na comhchathaoirligh a mhalairt de chomhthoil.

2. Déanfar achoimre sna miontuairiscí, mar riail ghinearálta, ar gach ítim atá ar an gclár oibre, agus sonrófar an méid seo a leanas iontu, i gcás inarb infheidhme: (a) na doiciméid arna gcur faoi bhráid an Chomhchoiste; (b) aon ráiteas a d'iarr comhalta den Chomhchoiste a chur leis na miontuairiscí; (c) na cinntí a glacadh; agus (d) aon bheart, mholtadh, chomhráiteas agus chonclúidí oibríochúla arna gcomhaontú i dtaobh ítimí sonracha.

3. Sna miontuairiscí, áireofar an clár oibre críochnaitheach agus liosta ainmneacha, teidil agus cleamhnachtaí na ndaoine aonair ar fad a bhí i láthair ag an gcruinniú i gcáil ar bith.

4. Formheasfaidh na comhchathaoirligh na miontuairiscí i scríbhinn laistigh de 60 lá ó dháta an chruinnithe nó faoi dháta ar bith eile arna chinneadh ag na comhchathaoirligh de chomhthoil.

5. Ullmhóidh Rúnaíocht an Chomhchoiste dréacht-achóimre ar na miontuairiscí freisin. A luaithe a fhorghéasfaidh comhchathaoirligh an Chomhchoiste téacs na hachóimre, déanfaidh siad an achoimre sin a phoibliú.

Airteagal 10

Cinntí

1. Glacfaidh an Comhchoiste cinntí de bhun Airteagal 20.2 den Chomhaontú de chomhthoil. Féadfar cinntí a ghlacadh, le linn tréimhsí idir cruinnithe an Chomhchoiste san áireamh, le nós imeachta i scríbhinn trí mhalartú nótaí idir Comhchathaoirligh an Choiste.

2. Ag gach cinneadh de chuid an Chomhchoiste, beidh sraithuimhir, dáta glactha agus teideal a thagraíonn dá ábhar. Déanfar foráil i ngach cinneadh maidir le dáta a theacht i bhfeidhm, agus féadfaidh an dáta sin a bheith faoi réir aon cheanglas agus nós imeachta is gá do gach Páirtí Conarthach a thabhairt chun críche.

3. Déanfaidh comhchathaoirligh an Chomhchoiste gach cinneadh a leagan síos i ndúblach agus a shíniú chun fíordheimhniú a dhéanamh.

4. Áiritheoidh na Páirtí Conarthacha go ndéanfar cinntí arna nglacadh ag an gComhchoiste a phoibliú.

Airteagal 11

Poiblíocht agus Rúndacht

1. Caithfear i modh rúin le hobair an Chomhchoiste. Mura gcinneann na Páirtí Conarthacha a mhalairt, ní bheidh cruinnithe an Chomhchoiste oscailte don phobal.
2. I gcás ina ndéanfaidh Páirtí Conarthach faisnéis a mheastar a bheith faoi rún nó faoi chosaint ar nochtadh faoina chuid dlíthe agus a rialachán a chur faoi bhráid an Chomhchoiste, caithfidh an Páirtí Conarthach eile leis an bhfaisnéis sin amhail agus go bhfuil sí faoi rún i gcomhréir le hAirteagal 17 den Chomhaontú.

Airteagal 12

Teanga Oibre

Mura gcomhaontóidh na Páirtí Conarthacha a mhalairt, is i mBéarla a bheidh an comhfhreagras agus an teagmháil ar fad idir na Páirtí Conarthacha a bhaineann le hobair an Chomhchoiste, chomh maith le hullmhú na gcinntí agus na moltaí agus le pléití ar chinntí agus ar mholtaí.

Airteagal 13

Speansas

1. Íocfaidh gach Páirtí Conarthach as aon speansais a thabhoíd sé de thoradh ar é a bheith rannpháirteach i gcruinnithe an Chomhchoiste.
2. Íocfaidh an Páirtí Conarthach, a bheidh ina óstach ar an gcruinniú, as an gcaiteachas maidir le heagrú cruinnithe agus atáirgeadh doiciméad.

Airteagal 14

Meithleacha agus comhlachtaí eile

1. De bhun Airteagal 20.3 den Chomhaontú, bunóidh an Comhchoiste na meicníochtaí oibre iomchuí, lena n-áirítear meithleacha, chun tacaíocht a thabhairt dá chuid oibre chun an Comhaontú a chur chun feidhme.
2. Déanfaidh an Comhchoiste maoirseacht ar obair na meithleacha agus na gcomhlachtaí eile ar fad arna mbunú faoin gComhaontú.
3. Cuirfidh na meithleacha agus na comhlachtaí eile arna mbunú faoin gComhaontú tuarascáil faoi bhráid an Chomhchoiste ar thorthaí agus ar chonclúidí gach ceann dá gcruinnithe.
4. Mura gcinnfear a mhalairt, beidh feidhm *mutatis mutandis* ag na Rialacha Nós Imeachta reatha sna meithleacha agus sna comhlachtaí eile arna mbunú faoin gComhaontú.